

Astiuneak antolatzeke ituna izenpetu dute Baionako Udalak eta CAF kutxak

CAF famili kutxak diru laguntza bereziak eskainiko ditu ekimen honetarako

Lutxi Fourcade / Baiona

Haurtzaro kontratua izenpetu ondoren, CAF eta Baionako Udala gazteriarri buruzko proiektuaz gogoetatzeko bildu dira. Proiektua onartuz gero, famili kutxak animazio inbertsioen %70 bere gain hartuko du.

HAURRAK eta gazteak zaintzea da Baionako Udalaren lehentasun bat. Izan ere, Herriko Etxean sartu zenetik, Jean Grenet auzapezak esan zuen gazteen politika garatzeko asmoa zuela, hiriko geroa haien eskuetan zelako.

Ildo honi jarraikiz, Udalak eta Baionako CAF kutxak haurtzaro kontratua izenpetu zuten 1997ko urtarrilaren 16an. Konbenioaren arabera, bi egiturek helburutzat finkatu zuten Baionan haurren harrera hobetzea. Proiektuak laguntzeko, kutxak bere gain hartu zuen inbertsioen %69,5a.

Kontratuaren xedeak bete dira, eta azken proiektua gaur estreinatuko da (Polo Beyris auzoko haurtzaindegi eraberritua). Alabaina, beste xede garrantzitsu bat beteazear dago oraindik: herriko haurtzaindegia. «Proiektua bide onean da, eta kokapena, arkitektoa eta lan taldea hau-



11 eta 16 urte bitarteko haurrentzako kultur ekintzak bultzatzea du helburu hitzarmenak.

tatu ditugu», azpimarratu zuen Grenetek.

Teknologia berriak eta musika

Indar berezia egin ondoren haurrentzat, Udalak eta CAF kutxak xantier berri bat abiatuko dute gazteei begira. Bi egiturek bat egin dute astiuneak eta oporrak antolatzeke sei eta hamasei urte arteko haurrentzat. Ekimen berria bultzatzeko, Jean Grenet auzapezak eta Jack Kipfer

CAFeko zuzendariak kontratu bat izenpetu zuten atzo Baionan. Lehen kontratuan bezala, CAFek lagundu egingo du, eta bere gain hartuko ditu Udalen inbertsioen %70.

Astiune kontratuaren gogoeta 1998ko udazkenean hasi zela oroitu zuen Jean Grenetek. Lehendabizi, bi egiturek egoeraren balantzea egin zuten. Herriko zerbitzuek eta elkarteek eskainitako animazio guztiak ikertu zituzten, puntu azkarrak eta ahulak zehazteko. «Esatera-

ko, ohartu gara eskas handiak zeudela teknologia berriak lantzeko edo musika jotzeko», azaldu zuen Xavier Lajaunie proiektuaren koordinatzaileak. Ondotik, ardatz nagusiak finkatu zituzten: lehentasuna ezarri 11-16 urte arteko gazteen animazioetan, kirol eta kultur praktikak bultzatzea, ikerketa batzordea sortzea... «Programa batzordeari aurkeztuko diogu, eta ekintzak proposatuko dituzte», gaineratu zuen.

Kalitateko ekoizpenaren aldarrikapena eginen du Baionako urdaiazpiko azokak

■ Laborantza ministroak IGP Geografi Jatorri Izena estreinatuko du

Lutxi Fourcade / Baiona

BAIONAKO urdaiazpikoaren besta iraganen da Baionan apirilaren 1ean, 2an eta 3an. Izan ere, aspaldiko ohiturari jarraikiz, urdaiazpikoaren azoka iraganen da merkatu estaliaren ondoko plazan. Antolatzaileek animazio franko hitzeman dituzte, eta etxeko mozkinaren lehiaketa iraganen da.

Baionako azoka aspaldiko historia da Baionan. Izan ere, urdaiazpikoaren feria antolatzeke baimena Philippe Auguste erregeak eman zuen 1222an. Etxeko urdaiazpikoak saltzeko aukera paregabea zen laborari ugarientzat. Alabaina, azken urteotan, gero eta laborari gutxiagok parte hartu dute azokan, eta ekoizpenaren kalitatea apaldu da. Arrakasta eskasari aurre egiteko, urdaiazpikoaren lehiaketa antolatuko dute azokako arduradunek azken bi urteotan

Jatorri izena

Ohiko azoka antolatzeaz gain, beste hitzordu garrantzitsu bat ere izanen dute urdaiazpikoaren defenditzaileek. Izan ere, Baionako xingarraren IGP edo Geografi Jatorri Izena estreinatuko da hurrengo apirilaren 2an. Label berri horrekin, tokiko ekoizpena babestua izanen da. Ondorioz, Baionako urdaiazpikoa Pirinio Atlantikoetako departamendu osoan eta beste 24 herritan baizik ez da ekoizten ahalko. Glavany Laborantza ministroa izango da ekitaldian, baita Alain Rousset Akitaniako lehendakaria eta François Bayrou departamenduko lehendakaria ere.

Estatuaren eta eskualdearen arteko plangintza lantzeko Turismoa eta Itsasertza taldea bildu da Miarrizten

Konpetentziari aurre egiteko, kalitatearen desafia altxatzea funtsezkotzat jo zuten atzoko bileran

Lutxi Fourcade / Miarritze

2000-2006 Estatua-Eskualdea plangintza ikertzen ari da, eta gogoeta bultzatzen sailez sail Akitania osoan. Itsasertza eta Turismoa taldea bildu da lau aldiz dagoeneko, eta bosgarren bilera atzo goizean egin zuen Miarrizten. Michel Moyrand Eskualdeko Kontseiluko

lehendakariordeak kudeaturik, 50 bat profesional, hautetsi eta kargudun ekonomiko elkarretaratu ziren plangintzaren lehentasunak finkatzeko.

«Itsasertzeko tailerrak bilera bat Miarrizten egitea normala iruditu zitzaigun, zeren Udalak ongi ulertu baitu turismoaren eragin ekonomikoa», esan zuen Moyrandek.

Izan ere, kostaldeko turismoa garrantzitsua da eskualdearen ekonomiaerentzat. «Akitaniako turistaren erdiak kostaldean biltzen dira. Oro har, 25 milioi gau kondatzen dira, eta 7 mila milioi liberaren mozkinak egiten dira urtean», gaineratu zuen. Gainera, turismoak lanpostu ugari sortu ditu: 27.000 urte osoan, eta beste 33.000 sasoian.

Alabaina, udatiarren kopurua mantentzen da, eta konpetentzia gero eta larriagoa da. Arazo horri aurre egiteko, kalitatea izanen dela kostaldeko profesionalen benetako desafia adierazi zuten bildutako lagunek. «70eko hamarkadan, MIACA ministerioen arteko bilerak proiektu zabal bat bultzatu zuen Akitaniako kostaldea garatzeko.